

Studentas muslimas en Svizra

Il faziel da chau sco problem

DA GUIU SOBIELA-CAANITZ

■ **En ils davos onns dal tschientaner passà han las guerras balcanaisas stimulà famiglias islamicas ad emigrar vers regiuns pli paschaivlas. Da Bosnia, Cosova e Macedonia èn vegnidas gruppas impurtantas.** Migrantas e migrants han fundà famiglias e tramess lur uffants en nossas scolas cuminaivlas. Era las figlias sa devan tutta fadia per vegnir promovidas sin stgalim secundar; las meglras han lura dominà la materia da quels trais onns. I speravan pia en in futur cun pensums pli interessants che lavar giu u schubregiar tualettas. Instruir uffants, tge bella incumbensa! Ma las scolas autas da pedagogia (saps) han lura manà auters impediments.

Co statti en scolas autas da pedagogia?

«Qui vengono i nodi al pettine», di il talian. Gea, chavels restan vi dal petgen; ma tge far cun tschels, quels che creschan vivanant? Las giuvnas muslimas han emprendì da las mammas, da las tattas, forsa era dals imams ch'ina brava muslima duaja zuppar ses chavels per na surmanar ils umens. Constat quai? Teologs islamicos astgan discutir en chaussa; igl è oramai ina

realitad che blers umans aderents da l'islam recumondan a muslimas da purtar almain in faziel da chau. Il schurnalist Simon Hehli scriva en la «NZZ» dals 22 da favrer: «En ils blers chantuns svizzers vala la regla che scolaras muslimas astgian purtar il simbol da lur cardientscha, magistras percunter betg. Uschè cler n'èsi betg per studentas da las saps) (...). Il codex da quella da Zug per exempel prescriba da renunziar a 'simbols marcants [auffällig] religios ed ideologics' sco crucifixs, faziels da chau u chippas giudaicas (...). Tenor l'Uffizi federal da statistica vivan en Svizra var 400'000 personas creschidas da religiun islamica (...). A la sap da Son Gagl a Rorschach per exempel studegiava dapi 2012 ina muslima cun cuvrachau. Il 2015 ha ella pudì concluder il studi, dentant mo perquai ch'ella era pronta da renunziar al faziel per il praticum. In cas analog hai dà er a Lucerna (...). A saps pli grondas sco a Berna u Turitg studegian (...) adina puspè muslimas cun cuvrachau (...). La sap da Turitg (...) surlascha la decisiun [davart il faziel] a la scola dal praticum» (p. 13). La discussiun davart la lescha genevrina «sur la laïcité de l'Etat», text acceptà dal pievel ils 10 da favrer, pertutga spezialmain «le port de signes religieux ostentatoires» (art. 7), pia er il faziel da chau.